

四庫全書

史部

欽定四庫全書

史部

通鑑釋文辨誤卷七

八

詳校官修撰臣錢 榮

刑部郎中臣許兆椿覆勘

總校官編修臣王燕緒

校對官修撰臣張書勲

謄錄監生臣張孝基

欽定四庫全書

通鑑釋文辯誤卷七

宋 胡三省 撰

通鑑一百四十二

凡二條

東昏侯永元元年魏邀齊兵歸路陳顯達引兵度水西  
人情沮恐

史炤釋文曰沮將豫切沮喪而恐思也

費本同

余按沮

喪之沮音在呂翻從將豫切者乃沮洳之沮也史炤  
以沮止之沮沮喪之沮讀為去聲者甚多不欲枚舉

讀通鑑者自決擇可也

顯達之北伐軍入洵均口馮道根說顯達曰洵均水迅急難進易退

史炤釋文曰洵均皆水名余謂洵均一水也按水經注均水有三名均水發源弘農郡盧氏縣之熊耳山南逕順陽縣當涉都邑之北南入于沔地理志言熊耳之山洧水出焉東南至順陽入于沔者也又曰順陽縣西有石山南臨洵水洵水又南流注于沔水謂

之洧口又曰沔水自武當縣東南流逕涉都城東北  
均水入焉謂之均口則洧洧均均雖有三名實一水也  
孫愐曰洧水名出析縣北山入沔今作均蓋洧均同  
音或曰洧口或曰均口後人遂連洧均二字言之謂  
為洧均口

通鑑一百四十四 凡三條

和帝中興元年魏主召禧勰詳入見曰比纏疋彥苟延  
視息

史炤釋文曰疹章忍切癰疹也一曰唇瘍

貴本同

余按

字書癰疹之疹章忍切疰疹之疹丑刃翻疰弱也疹疾也自言弱疾苟延視息若患癰疹何至言苟延視息哉史炤釋疹字一百七十二卷陳宣帝太建八年二百三十六卷唐順宗永貞元年皆誤而三變其說各辯于後

陳伯之收兵退保湖口留陳虎牙守湓城

史炤釋文曰湓水之城在廬江尋陽余按漢書地理

志尋陽固屬廬江郡然漢之尋陽在江北至晉以後  
尋陽在江南沈約宋志曰尋陽本縣名因水名縣水  
南注江二漢屬廬江吳立鄆春郡尋陽縣屬焉晉武  
帝太康元年省鄆春郡以尋陽屬武昌二年以武昌  
之尋陽復屬廬江郡是時尋陽縣猶在江北惠帝永  
興元年分廬江武昌立尋陽郡治江南之柴桑自時  
厥後江北尋陽之名移於江南而湓浦柴桑皆在尋  
陽郡管下史炤若言湓城在尋陽猶可言在廬江之

尋陽則不可

新亭城主江道林引兵出戰

史炤釋文作道怵音敕律切謂之非誤可乎

通鑑一百四十五

凡一條

梁武帝天監元年魏小峴戍主党濫宗襲大峴戍破之  
海陵本釋文曰小峴山名在襄陽大峴山名在琅邪  
陽都縣史炤釋一百二十八卷宋孝武帝孝建元年  
同余觀海陵本不從史炤之說以襄陽之峴山為小



峴琅邪之大峴關為大峴自以為得其說矣殊不知  
自襄陽至琅邪幾千百里豈輕兵掩襲之所能制勝  
乎況是時襄陽之峴山屬梁境琅邪之大峴關屬魏  
境党濬宗魏將也乃戍梁境之峴山而襲魏境之大  
峴關其說又為不通按小峴大峴在歷陽合肥之間  
小峴在合肥之東大峴又在小峴之東是後韋叡克  
小峴進攻合肥是小峴在合肥之東明矣宋孝武帝  
孝建元年魯爽自壽陽舉兵進屯大峴食少而退薛

安都自歷陽進兵追及夾於小峴斬之是大峴在小  
峴之東又明矣二峴相去蓋不甚遠也費本注曰党  
丁浪切余按党音底朗翻無從去聲者此亦蜀人土  
音之訛

通鑑一百四十六

凡三條

二年魏邢巒表云在南之日曾立巴州鎮靜夷獠

史炤釋文曰西南夷謂之獠

海陵本同

余按史炤以獠為

西南夷至是三矣已辯之於前今復申言之蜀主李

勢之時獠始自山出從巴西至犍為梓潼布滿山谷  
李延壽北史曰獠蓋南蠻之別種邛笮川洞之間散  
居山谷種類甚多略無氏族之別又無名字所生男  
女惟以長幼次第呼之二百四十五卷唐僖宗中和  
二年炤又以獠為戎夷別名是又略變前說而其誤  
終身不能改也

五年魏涇州陳瞻亦聚衆稱王

史炤釋文曰涇宣城邑余謂此魏所置涇州也按魏

收地形志魏置涇州於安定臨涇城若宣城郡之涇縣則在江南屬梁非魏土也且通鑑書魏涇州而以梁宣城郡之涇縣為釋曾是可以欺後學乎

將軍藍懷恭與魏邢巒戰于睢口敗績巒進圍宿豫

史炤釋文曰睢水之口在元魏梁郡余按水經注睢水首受陳留菴蕩渠東過梁國睢陽縣南又東過相縣故城南又東逕彭城之靈壁東又東逕睢陵縣故城北又東南逕下相縣故城南又東南流入于泗謂

之睢口睢口不在梁郡也

通鑑一百四十七

凡五條

七年馬仙琕籤求應赴

史炤釋文曰籤郵籤

海陵本同

余按李延壽南史故事府

州部論事皆籤前直叙所論之事後云謹籤月日下  
又云某官某籤馬仙琕籤求應赴正此籤也以為郵  
籤何所據乎

魏邢巒乘勝長驅至懸瓠因度汝水圍其城

史炤釋文曰汝水出上洛盧氏還歸山東入淮余按汝出盧氏過梁縣又東南過潁川却縣又東南過定陵郾又東南過汝南上蔡縣西又東逕懸瓠城北汝水枝別左出西北流又屈西東轉又西南會汝形若懸瓠城因名焉故邢巒之兵度汝水而圍懸瓠史炤但能言汝水所出及所入處耳

八年許懋議孫皓嘗遣董朝至陽羨禪國山

史炤釋文曰陽羨會稽邑

海陵本同

余按陽羨縣前漢屬

會稽郡後漢屬吳郡東晉以後屬義興郡又分陽羨  
為國山縣

九年吳承伯反奄至吳興吏民恇擾

史炤釋文作恇擾注曰音巨恐擾也

海陵本同

余按恇字

乃恇字之誤也炤從而為之音釋繆矣字書亦無恇  
字恇音去王翻

十年魏汾州山胡劉龍駒聚衆反

史炤釋文曰汾水出太原晉陽山西南入河後魏置

汾州余按汾水所出所經所入已辯於一百二十四  
卷宋文帝元嘉二十三年但史炤今之注較之前注  
愈誤汾水出太原汾陽北山非晉陽山也且魏太和  
十二年置汾州治蒲子城孝昌之亂淪陷又移治西  
河領西河吐京五城定陽等郡此時汾州猶治蒲子  
劉龍駒蓋山胡種居汾州部內者也炤以汾水出入  
處釋汾州失之遠矣

通鑑一百四十八 凡一條



十五年淮堰成或謂康絢鑿漿東注又縱反間於魏蕭  
寶寅信之鑿山深五丈開漿北注

史炤釋文曰漿即由切水名或普焦切余按漿字惟  
丁度集韻有之無普焦切一音以通鑑本文觀之漿  
者溝瀆之類非水名也

通鑑一百四十九 凡一條

普通二年琬琰殿火

史炤釋文曰琬琰璧名余按周禮有琬圭琰圭鄭氏

注曰琬猶圓也琰刻上如是則琬圭圓其上琰圭刻其上琬琰皆圭名非鐸名然此以琬琰名殿耳而致辨於圭鐸之間正以分別字義不得不爾

通鑑一百五十

凡五條

五年魏涼州幢帥于菩提等

史炤釋文曰幢帥猶連率也余按禮記王制三十國為連連有率魏安能行古制哉柔然之法百人為幢幢有帥

秀容人乞伏莫干聚衆攻郡殺太守南秀容牧子萬干  
乞真反秀容酋長爾朱榮討平之

史炤釋文曰秀容本漢汾陽縣地後省之至元魏置  
肆州秀容縣按史炤之誤余已辯之於一百八卷晉  
孝武帝太元十九年而爾朱居秀容之本末則未之  
及也按爾朱氏世居秀容川爾朱榮高祖羽健從魏  
主珪攻燕主寶有功環其所居割地三百里以封之  
爾朱氏自此彊盛此北秀容也又有南秀容則漢汾

陽縣地也魏置秀容郡及秀容護軍於此其地在汾水之北北秀容又在汾陽之北史家慮北秀容南秀容之無以別也故乞伏莫干則曰秀容人萬干乞真則曰南秀容牧子此其分別甚明史炤不能詳考混而言之非深於通鑑者也

魏郢州刺史裴詢與蠻酋西郢州刺史田朴特相表裏史炤釋文曰郢州名屬後魏余謂若如炤釋則凡欲注書以求自見於後世者豈不甚易按是時南北分

王各有郢州魏置郢州於義陽梁郢州則治夏口

六年崔延伯別造大盾內為鎖柱使壯士負而趨

史炤釋文曰盾食尹切本作輜車轉者

海陵本同

余謂盾

即干盾之盾所以捍鋒矢者輜者載柩之車音勅倫  
翻史炤繆矣

邵陵王編問賣鮓者令吞鮓而死

史炤釋文曰鮓七演切魚名皮可為鼓一曰蛇鮓黃

質黑文

海陵本同

余按皮可為鼓者鼉也陸璣草木疏云

鼉似蜥蜴四足長丈餘甲如鎧皮堅厚宜冒鼓詩所  
云鼉鼓逢逢者蓋鼉皮所冒之鼓也字書鼉字亦作  
鰐音徒何切既皮可冒鼓豈人所能吞哉曰蛇鰐者  
近之鰐亦作鰐音七演翻二字同而音異故炤釋莫  
知所決擇

通鑑一百五十一 凡二條

七年魏安州三戍兵反杜洛周自松岍赴之

史炤釋文曰岍苦堅切地名

海陵本同

余按岍字當讀與

峴陁同音戶經翻唐志營州西北百里曰松陁嶺魏  
安州治廣陽郡之方城縣唐檀州是也

大通元年魏源子邕裴衍行至陽平漳水曲

史炤釋文曰漳水在陽平東北山海經云漳水出荆  
山南注于沮水余按炤因通鑑本文知漳水在陽平  
東北而又引沮漳之漳水雜以為釋習之而不察甚  
矣魏文帝分魏郡置陽平郡治館陶

通鑑一百五十二 凡五條

二年魏北道行臺楊津守定州城居鮮于脩禮杜洛周之間迭來攻圍

史炤釋文提起間迭二字註云間居覓切代也廁也余按史炤之說則以間迭來攻圍為句殊不顧上句讀不成文其繆甚矣當以居鮮于脩禮杜洛周之間為一句迭來攻圍為一句間讀如字

郡民續靈珍攻番城以應梁

史炤釋文曰番蒲何切余按蕃縣漢屬魯國晉惠帝



元康中廢屬彭城郡魏收地形志曰孝昌三年置蕃  
郡治蕃城元象二年併彭城武定五年復置蕃郡漢  
書音義番陽縣之番音蒲何翻魯國蕃縣之蕃音皮  
或云皮反字之誤反讀如字是時梁將王弁侵魏徐  
州蕃郡民續靈珍攻蕃城以應梁此蕃郡蕃城即漢  
魯國之蕃縣傳寫通鑑者番上缺艸遂為番郡番城  
史炤又從而音蒲何切誤矣

葛榮列陳數十里箕張而進

史炤釋文曰箕張猶春秋魚麗之陳余按左傳魚麗之陳先偏後伍伍承彌縫箕張之陳與魚麗之陳固當不同列宿之象箕張翼舒箕四星下二星翕而相近上二星開張列陳前濶而後狹故曰箕張即今軍中言杞頭陳也

葛榮至洛魏主御閭闔門引見

史炤釋文曰閭闔天門也

海陵本同

余按閭闔門洛陽宮

城門辯已見八十四卷晉惠帝太安元年史炤前說

已誤此又以閭闔為天門宮城門固取天門以為名  
然徑以為天門則不可一百六十卷太清元年閭闔  
門注亦誤

羊侃自瑕丘潰圍出魏境至渣口

史炤釋文曰渣側加切水名出義陽一作澰

海陵本同

余

按水經注偃陽有祖水南亂沂而注于沭謂之祖口

祖音側加翻即此渣口也但字異耳杜預曰澰水出

義陽厥縣西義陽唐之申州瑕丘唐之兗州治所偃

陽在唐徐州界羊侃南奔自瑕丘至徐州之渣口道里甚徑若自兗州至申州道里甚遠觀者可以知所決擇矣

通鑑一百五十三

凡二條

中大通元年魏楊昱據滎陽陳慶之攻之將士相帥蟻附而入

史炤釋文曰蟻虺蟬也附者謂其能屯聚也余謂蟻能附著木石牆壁而行緣而登高史言陳慶之將士

緣滎陽城而登若蟻之附木石牆壁而登高然非以蟻能屯聚為諭也

初魏以梁益二州境土荒遠更立巴州以統諸獠又立隆城鎮

史炤釋文曰巴春秋時巴地晉宋間為夷獠所居至後魏得其地立巴州余按漢書地理志巴郡十一縣皆春秋時巴國之地漢獻帝時劉焉劉璋父子分巴為三郡其後分置郡縣寔以益多自閬渝至于夔涪

皆巴地也未嘗盡為夷獠所居三國之時蜀都護李  
嚴嘗請以五郡為巴州諸葛亮不許至蕭齊卒置之  
蕭子顯齊志曰三峡險隘山蠻寇賊宋末置三巴校  
尉以鎮之既省復置齊高帝建元二年置巴州分巴  
東建平涪陵巴郡屬焉武帝永明元年省巴州故天  
監二年邢巒表魏主曰在南之日嘗立巴州鎮靜夷  
獠謂此也由此觀之巴州之立尚矣特廢置不常耳  
非魏立也

通鑑一百五十四 凡二條

二年魏爾朱榮曰擁生蠻北填六鎮

史炤釋文曰填讀曰鎮余謂此乃補填之填音停年  
翻言欲驅生蠻以補填六鎮叛亡之戶

陳慶之引兵圍懸瓠破魏潁州刺史婁起等於溱水

史炤釋文曰溱側說切水名在河南余按此史炤據  
廣韻以為釋也廣韻所謂溱水在河南者以周宣王  
弟鄭桓公邑于新鄭而食溱洧新鄭縣漢屬河南郡

故云然時陳慶之圍懸瓠懸瓠城在汝南安能北至  
新鄭之漆與婁起等戰也水經注漆水出汝南平輿  
縣浮石嶺北青衣山東南逕朗陵縣故城西東北逕  
宜春縣故城北又東北入于汝陳慶之破婁起等實  
於此水也

通鑑一百五十六

凡四條

五年賀拔勝遣軍攻馮翊安定沔陽鄼城皆拔之於是  
沔北蕩為丘墟矣



史炤釋文曰沔陽漢中邑余按漢中郡自漢以來固  
有沔陽縣然以歷代地志考之宋立馮翊安定等僑  
郡於沔北梁置沔陽郡於漢竟陵縣之地後周以為  
復州置鄴城郡於漢陰縣之地亦皆沔北北屬梁雍  
州刺史以通鑑下文觀之可以知矣漢中之沔陽縣  
屬梁州時梁州之地已為魏有史炤釋非

魏主西奔至稠桑潼關大都督毛鴻賓迎獻酒食

史炤釋文曰稠桑地名在滎陽西余按魏主自洛西

奔至稠桑而毛鴻賓自潼關迎獻酒食則稠桑在洛陽之西潼關之東明矣恒農郡胡城縣有稠桑驛通鑑書魏主先至胡城而後至稠桑稠桑在胡城之西不在滎陽之西滎陽在洛陽東去稠桑遠矣一百八十四卷隋恭帝義寧元年竇琮等追及屈突通於稠桑炤釋亦誤但兩事有自東徂西自西徂東之異耳辯見於後

賀拔勝自南陽帥所部西赴關中至浙陽

史炤釋文曰浙音熱切浙陽郡名浙水所出余按魏  
浙陽郡漢弘農郡析縣之地也有析水後魏置析陽  
郡魏收地形志只從漢書作析字隋書五代志乃作  
浙字宋朝鄧州浙川內鄉二縣即其地炤以為浙水  
所出是矣若音旨熱切則浙字非浙字也

魏孝武帝閨門無禮

史炤釋文作闔門注云闔胡獵切閉也今按通鑑諸  
本皆作閨門下文書閨門無禮事甚詳史炤誤矣

通鑑一百五十七 凡三條

大同三年東魏丞相歡遊汾陽之天池

史炤釋文曰汾水之陽河東邑余按汾陽縣自漢至後魏皆屬太原郡魏自正光以後北邊盜起恒朔陷沒乃置秀容郡於漢汾陽縣地唐忻州之秀容縣是也若隋地理志太原郡之汾陽縣則漢之陽曲縣地漢之汾陽縣與隋之汾陽縣皆非河東邑而高歡所遊者乃秀容之汾陽也隋煬帝建汾陽宮即此地

魏大都督宇文貴進據潁川東魏行臺任祥退保宛陵  
史炤釋文曰宛陵宣城邑彭澤聚在西余按史炤參  
取漢書地理志及晉書地理志以為釋殊不知地理  
志漢河南郡又有苑陵縣晉屬滎陽郡後魏屬陳留  
郡天平以後屬廣武郡任祥所退保者也詳考諸志  
宣城之宛陵與任祥所保之苑陵字有苑宛之異傳  
寫者誤以苑為宛史炤遂誤釋為宣城之宛陵所謂  
差之毫釐繆以千里也

魏行臺楊白駒與東魏陽州刺史段粲戰于蓼塢

史炤釋文曰蓼即安豐之邑

同 費本

余按漢書地理志

蓼六二縣皆屬六安國蓼六春秋時猶為列國臯陶  
之後也俱為楚所滅晉地理志蓼縣始屬安豐郡然  
考魏收地形志此時東魏置陽州於宜陽西魏以楊  
白駒為行臺使之東略其交兵正在河潼間安得戰  
於安豐之蓼邑邪水經注蓼水出河北縣襄山蓼谷  
蓋當時之人於此谷築塢因謂之蓼塢漢書音義曰

襄山在潼關北十餘里

通鑑一百五十八 凡二條

四年魏廣州守將駱超

史炤釋文作駱越注曰駱姓也越其名余按駱越乃漢時南方蠻之種名此魏將也通鑑諸本皆作駱超參考通鑑前後所書亦超字為是炤於一百五十四卷中大通二年亦以為駱超

九年宇文泰登邙山以襲高歡黎明泰軍與歡軍遇

史炤釋文曰黎音離黎猶比也謂比至天明也

海陵本同

余按史記黎明之黎作邈說文曰邈徐也讀與黎同音力兮翻程大昌曰徐廣云黎猶比也將明之時也此說非也黎黎字通黎黑色也黑與明相雜欲曉未曉之交也猶曰昧爽也昧暗也爽明也亦明暗相雜也遲明即未及乎明也厥明質明則已曉也讀黎如離恐駭俗且當從說文音此音亦有黑義字書黎字亦有從力兮翻者



通鑑一百五十九 凡一條

十一年柔然頭兵可汗使其弟禿突佳來送女且報聘  
史炤釋文以聘為娉注曰說文娉問也謂昏禮問名  
余按古禮有交聘之聘有聘女之聘說文始以聘女  
之聘為娉字與交聘之聘分為二字然古之聘字雖  
同而時聘之禮與聘女之禮異周禮時聘曰問以結  
諸侯之好又曰穀圭以聘女此聘字之同也春秋左  
氏傳宣九年孟獻子聘于周十年劉康公來報聘交

聘之聘也文四年貴聘而賤逆君子是以知出姜之不允於魯七年穆伯又聘於莒莒人以聲已辭則為襄仲聘焉聘女之聘也聘字皆同而為禮則異凡讀經傳者居然可知也左傳書報聘之事非一柔然固不可以古禮律之然其使弟來送女則猶古人致女之禮也報聘則是報高歡之使聘亦古者列國來聘報聘之意史言且者謂送女且報聘也當是時高歡未嘗許以女女柔然何昏禮問名之有若問名不當

言報聘字只當作聘字以交聘之聘為釋且者不專為一事并有餘事之謂

通鑑一百六十

凡二條

太清元年荀濟知上有大志然負氣不服常謂人曰會於盾鼻上磨墨檄之

史炤釋文曰矛盾之鼻也余按荀濟只言盾鼻史炤乃汎引矛為說以雜之盾之有鼻蓋盾背有隆起處故謂之鼻記朱干設錫鄭玄注曰干盾也錫傳其背

如龜也正義曰詩云鏤錫謂以金飾之用金琢傅其盾背盾背外高龜形亦外高故云如龜蓋見漢禮然也或謂錫即盾鼻矛若有鼻當施於何所

二年西豐公大春守石頭

史炤釋文曰石頭在丹陽秣陵建業中孫權城之余按江左置丹陽尹秣陵建業二縣皆治京邑建業改為建康自避晉愍帝諱始當時二縣分治以秦淮水為界炤以為在秣陵建業中者抑以為在二縣中間

邪既不能指定實處而其文質俚亦甚矣且漢建安  
中孫權築石頭城至此三百餘年通鑑書石頭事凡  
幾史炤於魏文帝黃初五年晉海西公太和五年釋  
已誤此釋又添一誤也張舜民曰石頭去臺城九里  
天生城壁在清涼寺北覆舟山上江行自北來者循  
石頭城轉入秦淮

通鑑一百六十二

凡二條

李遷仕樊文皎帥銳卒五千深入至荻首橋東

史炤釋文曰蒜首橋在淮地

海陵本同

余按淮者秦淮水

也李遷仕等先將兵度淮攻東府前柵焚之侯景還  
衆軍營于青溪之東遷仕又進至蒜首橋東則此橋  
當在青溪上曰在淮地何邪

御甘露厨有乾苔味酸鹹分給戰士

史炤釋文曰苔蘚也

海陵本同

余謂苔生於海其形如髮

春二三月海人採取之納土窖中出而曬之成片今  
南人多食之若苔蘚者生於階墻及陰濕之地安可

食邪

通鑑一百六十三 凡二條

簡文帝大寶元年陳霸先修崎頭古城徙居之

史炤釋文曰崎頭城名在梁地余謂侯景雖專梁命未改江淮以南皆梁地崎頭為梁地一語不注可也按陳霸先自始興出兵度大庾嶺既破蔡路養於南野遂居崎頭古城崎頭之地今不可知必在南康郡界南康今贛州

侯景遣侯瑱隨于慶徇蠡南諸郡

史炤釋文曰蠡南地名蠡力弓切又力底切余謂蠡南諸郡指彭蠡湖以南諸郡如豫章廬陵安成臨川南康是也蠡音禮力弓切非

通鑑一百六十四 凡二條

二年任約追胡僧祐及於芋口

海陵本釋文作芋口芋羽俱切又王遇切地名余按芋字本芋字之誤姚思廉梁書曰芋口在南平郡安



南縣界不能博考而妄為音切可乎芊音千

元帝承聖元年侯子鑒以鵠鵠千艘載戰士

海陵本釋文曰鵠鵠上止遙切又陟交切下力鳥切  
余按丁度集韻鵠丁了翻鵠朗鳥翻類篇曰鵠鵠船  
長貌海陵本音釋殊無所據

通鑑一百六十五

凡一條

三年嚴超達自秦郡進圍涇州

費本注曰涇州蓋以涇水為名余按五代志江都郡

永福縣梁置涇州領涇城東陽二郡李延壽北史曰  
梁涇州在石梁此乃因涇城以名州非涇水也

通鑑一百六十六

凡三條

敬帝紹泰元年齊平秦王歸彥諧清河王岳曰清河僭  
擬宮禁制為永巷

史炤釋文曰永巷列宮名有長巷故名之也余按宮  
中長巷曰永巷自應劭已有此說未嘗以永巷為列  
宮名高歸彥諧高岳謂其私第僭擬宮中為永巷耳

觀通鑑本文可見炤說之僻繆一百七十卷陳宣帝  
太建元年永巷史炤復有此繆說

晉安民陳羽世為閩中豪姓

史炤釋文曰閩中郡名即南越地余按閩中乃漢閩  
越地非南越地梁亦未嘗置閩中郡下卷陳武帝永  
定元年誤同

太平元年魏以岐陽之地封安定世子覺為周公

史炤釋文曰岐陽本元魏秦平郡至西魏改余按西

魏改秦平郡為岐山郡未嘗改為岐陽魏以岐陽之地封宇文覺蓋指岐山之陽漢雍郿二縣地後魏真君六年於漢郿縣地置周城縣岐山之下周自古公亶父至文王居之故謂之岐周拓跋之縣名字文之國號皆本諸此

通鑑一百六十七 凡五條

陳武帝永定元年齊以長廣王湛為尚書令

史炤釋文曰湛市林切又持林切丈減切余謂上兩

音皆非也當從下音

周晉公護與李植相質植辭窮

史炤釋文曰質職利切質當以為信余謂質職日翻對面相辨正為質禮記曲禮夫人之諱雖質君之前臣不諱也鄭注云質猶對也是質有對之義通鑑下文言李植辭窮可以知非質當之質也至一百七十三卷宣帝太建十年齊王憲與于智相質炤則曰質職日切正也謂正自相當釋相質之義雖未為明切

而亦知臧利切之為非矣

置刪定郎治律令

史炤釋文曰陳置此官以治律令余謂注書如此何  
所發明按曹魏之世置尚書曹二十三郎有定科郎  
劉宋置十九曹郎文帝元嘉十八年增置刪定曹郎蓋  
魏世之定科郎也至于齊梁亦皆置之以刪定律令  
陳受梁禪政事皆由中書省置二十一局各當尚書  
諸曹總國機要尚書惟聽受而已特置刪定郎以治

律令

帝裸程為樂

史炤釋文曰程袒也古禪衣趙魏之間無袞者謂任  
余按朱氏孟子解裸程露身也義甚簡明禪衣之說  
本之廣韻無袞謂任此語全不可曉或者任字其程  
字之誤乎若服禪衣則非裸程矣炤不過欲艱深其  
辭以罔後學

二年惶怖且悲不覺聲顫

史炤釋文曰臙注云旨善切搖也通作顫余按通鑑  
釋文正作顫字當音之膳翻臙音旨善切者孫愐云  
裸形無可蔽也非聲顫之義

通鑑釋文辯誤卷七



欽定四庫全書

通鑑釋文辯誤卷八

宋 胡三省 撰

通鑑一百六十八 凡一條

文帝天嘉三年和士開善握槊

史炤釋文曰槊通作稍矛長丈八者為槊

海陵本同

余按

握槊局戲也李延壽曰握槊蓋胡戲近入中國劉禹錫觀博曰握槊之器其制用骨觔稜四均鏤以朱墨耦而合數取應日月視其轉止依以爭道史炤乃以

金匱要略卷八  
為握丈八之槊是但知槊之為兵器而未知握槊之為局戲也

通鑑一百六十九 凡二條

五年陳寶應逃至莆口

史炤釋文曰莆音甫

海陵本同

余按莆口在唐泉州莆田

縣界今興化軍之地莆音蒲音甫非

天康元年周信州蠻冉令賢等反遠結涪陽蠻為聲援

史炤釋文曰涪陽渚之蠻在郢中余按後周置信州

於永安唐之夔州也酈道元曰江陵西北有紀南城  
楚文王自丹陽徙此平王城之班固言楚之郢都也  
楚辭曰遭吾道兮洞庭望沔陽兮極浦屈原楚人也  
至洞庭然後可以望沔陽則沔陽之不在郢中亦明  
矣道元又曰沔水出作唐縣西北天門郡界南流逕  
沔評屯屯竭沔水溉田數千頃又東南流注于澧水  
沔陽蓋居是水之陽也二百六十六卷梁太祖開平  
元年雷彥恭攻沔陽公安正此沔陽史炤釋亦誤九

域志江陵府公安縣有沔陽鎮

通鑑一百七十

凡八條

臨海王光大元年巴山太守黃法慧從宜陽出醴陵共襲華皎

史炤釋文作澧陽注曰天門邑余按地理志醴陵澧陽自是兩縣醴陵縣後漢置屬長沙郡澧陽縣晉武帝太康中立天門郡治焉時華皎據長沙安成王瑒使吳明徹等帥舟師泝江攻之又使黃法慧從宜陽

出醴陵以襲其不備宜陽漢之宜春縣也晉孝武帝避其母鄭太后諱改為宜陽今耒州宜春郡也自宜春至醴陵不及二百里澧陽則在洞庭太湖之北自宜春襲長沙不出澧陽也

齊主封弟仁約為樂浪王

史炤釋文曰樂浪郡名古朝鮮之國其地系北齊余按齊主以古郡名爵諸弟為王耳未嘗使之君國子民樂浪古朝鮮之地自晉至于慕容氏之末世已不

能有其地北齊安能系屬之哉

宣帝太建三年周遣右武伯谷會琨等聘于齊

史炤釋文作琨注曰其字未詳余按通鑑諸本皆作琨炤所見本於琨旁王偶缺一畫耳

五年齊人於秦郡置秦州州前江浦通涂水

史炤釋文曰涂同都切水出益州牧靡南山西北入

繩海陵本同余按晉惠帝置堂邑郡於漢堂邑縣至安帝

改堂邑郡為秦郡以秦之僑人居其地故也北齊取

淮南就以秦郡置秦州唐滁州六合縣即其地因滁水以名州涂讀為滁辯已見七十五卷魏邵陵厲公嘉平三年八十卷晉武帝咸寧五年漢益州郡牧靡之地自宇文併蜀弃之荒外宇文且不能有其地齊人境土西限於宇文其能有牧靡之地乎是時陳師伐齊以復淮南豈攻益州哉此乃漢堂邑之滁水非漢牧靡之涂水也

七年周主伐齊鮑宏曰進兵汾潞直掩晉陽

史炤釋文曰汾潞二州名系後周余按周齊敵國疆場之間各置州郡齊置汾州於西河周置汾州於定陽若潞州上黨郡則屬齊地周建德六年始平齊陳太建之九年也宣政元年分并州上黨郡始置潞州太建之十年也烏得於太建七年以潞州系後周哉蓋鮑宏論伐齊直言進兵之路不指州名而指水名自汾水取平陽過崔鼠谷可以掩晉陽自上黨潞川入壺關黃澤亦可以掩晉陽非指二州名也



八年周主謂羣臣曰朕去歲屬有疾疹遂不得克平逋寇

史炤釋文曰疹章忍切癰疹皮外小起也余按此疾疹之疹與疔字同音丑刃翻經傳作疔作疹者俗書也周武帝舉大兵以伐國不應以皮外小起癰疹而還師史炤之淺妄率如此至二百三十六卷唐順宗永貞元年方能以疹為久疾乃因通鑑正文積疹而生義然音切終不能改也

前出河外直為拊背未扼其喉

史炤釋文曰拊拊也謂摩其背也余按周主此語本之婁敬婁敬說高祖曰夫與人鬪不扼其吭而拊其背未能全勝周武帝前此伐齊至河陰而還以鬪為喻猶拊背也拊者擊也不當以拊摩為說若與人鬪而拊摩其背乃是為之搔痒豈是與之鬪邪一百八十四卷隋恭帝義寧元年拊其背注亦誤

齊主獵於祁連池

史炤釋文曰祁連山之池也在匈奴中余謂此祁連池汾陽之天池也即後所謂獵於天池者也史互言之耳北人謂天為祁連故天池有祁連池之名猶匈奴呼天山為祁連山也祁連山漢書音義釋之甚明汾陽之天池水經注言之甚詳余悉取以注通鑑能讀之者可考見也且齊主獵時周兵已攻晉州若獵於匈奴界中祁連山之池安能以丙辰獵而癸亥即還晉陽邪天池在汾陽縣北燕京山上方里餘燕京

山亦謂之管涔山五臺山之一也詳考通鑑所書九月癸亥齊主自獵所還晉陽甲子即集兵庚午帥諸軍趣晉州癸酉昧旦晉州陷此日齊主已分軍向千里徑及汾水關又帥大軍上鷄栖原矣若方與馮淑妃獵於天池驛奏沓至且不暇省安能部分出軍邪蓋通鑑會粹諸書以為一書其排日書甲子以李百藥北齊書令狐德棻後周書帝紀為據自與馮淑妃獵天池至晉州已陷乃奏之一段是引用李延壽北

史馮淑妃傳所以所記有參差不齊者竊謂丙辰齊主獵於祁連池與後所書與馮淑妃獵於天池實一事也唐書地理志嵐州靜樂縣有天池祠竇革曰天池祠在今寧化軍北六十里橫嶺下管涔山

通鑑一百七十三 凡一條

七年齊領軍大將軍尉相願

史炤釋文曰相息良切姓也願其名相氏出姓苑又息浪切後秦錄有馮翊相雲作德獵賦余按史炤之

說皆以廣韻為據然尉相願者姓尉名相願若如炤說以相為姓願為名將以尉字為衍字乎時高氏所用皆勲戚也尉相願之進用必以尉景

通鑑一百七十四

凡三條

十二年于仲文軍至蓼隄去梁郡七里

史炤釋文曰蓼縣之隄音力竹切費本同余考五代志

梁郡無蓼縣也元豐九域志曰蓼堤漢梁孝王築在梁郡西北通鑑本文言去梁郡七里若以蓼縣為梁

郡附城之縣則當治郭下若以蓼縣為外縣無緣去城七里便置縣史炤之說不待攻而破矣蓼讀如字于仲文取金鄉席毗羅軍大潰爭投洙水死

史炤釋文曰洙水出泰山蓋縣臨樂山北入泗余按史炤能言洙水所出與所入而已水經洙水自蓋縣西南流至卞縣入泗酈道元注則曰洙水至卞城西南入泗水亂流西南至魯縣東北又分為二南為泗水北為洙瀆春秋莊九年浚洙杜預謂洙水在魯城

北浚之以備齊者也孔子教於洙泗之間闕里是也  
從征記曰洙泗二水交於魯城東北十七里闕里背  
洙泗洙水又南逕瑕丘城又西南逕山陽南平陽之  
顯閭亭又南至高平南入于泗金鄉縣在高平西北  
縣北有金鄉山前漢未置金鄉縣後漢晉志方有之  
戴延之西征記焦氏山北有數山漢司隸校尉魯恭  
葬山南鑿而得金故曰金鄉山金鄉去洙水差遠蓋  
席毗羅軍既潰走于仲文追奔蹙之洙水故爭投水



而死也

周殺代曩王達滕聞王逋

史炤釋文曰代徒對切姓也曩平祕切名也玉音肅姓也達其名

海陵本同

余謂史炤以代曩王達為二人姓

名則下文滕聞王逋亦二人姓名乎釋文以古有玉姓欲以稀姓愚後學殊不思讀通鑑者詳味上下文則代與滕其封國也曩與聞其謚也達與逋其名也其姓則字文皆後周親王也楊堅專周政而殺之加

金史卷八  
卷八  
以惡謚炤既不能發顧以代曷王達四字離析為二人姓名將以愚人人有知識其可愚乎代音徒耐翻王讀如字十一家謚法色取行違曰聞不醉而怒曰曷

通鑑一百七十五

凡三條

十三年隋主如岐州

史炤釋文曰岐州元魏所置至隋廢之余按魏書地形志太和十一年置岐州治雍城鎮至煬帝大業三

年始改州為郡是年隋文帝受周禪改元開皇岐州未廢也若已廢岐州則史不書如岐州矣

沙鉢略從父玷厥居西面號達頭可汗

史炤釋文曰玷厥突厥種名余按通鑑本文明言玷厥為沙鉢略之從父號為達頭可汗讀者皆知玷厥為人名而釋以為突厥種名何其舛也

長城公至德元年吐谷渾寇隋臨洮州刺史皮子彥出戰敗死汶州摠管梁達擊走之

史炤釋文曰汶音問以汶水為名水出琅邪余按吐谷渾居西垂時寇洮岷汶州即唐之岷州與漢之汶山郡之汶同史炤以琅邪汶水為釋音義皆誤汶山之汶讀曰岷辯已見七十二卷魏明帝青龍元年

通鑑一百七十六 凡二條

二年隋以賀婁子幹為榆關總管

史炤釋文曰榆關在隴右蒙恬為秦將侵胡開地數千里壘石為城樹榆為塞是也余按在隴右者漢金

城郡之榆中縣也蒙恬壘石為城樹榆為塞者漢上郡之榆林塞也隋置榆關總管於唐勝州界

三年豐州刺史章大寶昭達之子也在州貪縱朝廷以太僕卿李暈代之

史炤釋文作本暈注曰本與床同戎姓暈其名

海陵本同

余按本字乃李字之誤也史炤別引床字以為說此與徐道明見鄭玄論語序云書以八寸策誤作八十宗因曲為之說者何異

通鑑一百七十七 凡一條

隋文帝開皇九年陳武州刺史鄔居業

史炤釋文曰鄔姓也鄔郡太守司馬彌牟之後因以

為氏

貴本同

余按史炤據廣韻而為釋也左傳昭二十

八年晉滅祁氏羊舌氏分其田以為縣以司馬彌牟

為鄔大夫是以鄔為縣非以鄔為郡也以司馬彌牟

為縣大夫非以為郡太守也秦罷侯置守三十六郡

皆曰守至漢景帝中二年始以郡守為太守此皆考

之不精之過也

通鑑一百七十八凡一條

十八年設鹿角為方陳

史炤釋文曰鹿角陳名猶春秋魚麗之陳爾余按炤於一百五十二卷梁武帝大通二年葛榮列陳箕張而進釋曰箕張猶春秋魚麗之陳於此又曰鹿角猶春秋魚麗之陳如此則凡陳法惟有魚麗陳一法而已嘻可笑也設鹿角為方陳者斬木存其大本凡枝

皆剡其端如鹿角然埋之陳前以禦胡馬衝突內為方陳非如春秋魚麗之陳也

通鑑一百七十九

凡二條

二十年車騎將軍榆林閭毗

史炤釋文曰榆林縣名隋置勝州兼置此縣其地有榆溪塞即蒙恬為秦侵胡累石為城樹榆為塞是也余按史炤於一百七十六卷陳長城公至德二年隋以賀婁子幹為榆關總管注云榆關在隴右下亦引



蒙恬樹榆為塞事今又以為在勝州以此注為是則  
前注為非矣蓋炤以為勝州者以隋志勝州榆林郡  
及榆林縣為據也然引樹榆為塞事酈道元以為在  
上郡道元曰諸次水出上郡諸次山其水東逕榆林  
塞即漢書所謂榆溪舊塞者也自溪西去悉榆柳之  
叢緣歷沙陵屈龜茲西出故謂之廣長榆也王恢云  
樹榆為塞謂此矣以水經河水所歷考之其地在銀  
夏之北唐之綏銀麟勝皆漢上郡地炤前言榆關在

隴右非也今因榆林而引樹榆為塞事則近之

仁壽二年忤意者嚴霜夏零

史炤釋文曰零雨余謂此言楊素威權忤其意者禍罰立至如當夏降霜非零雨之謂也

通鑑一百八十

凡二條

四年嵐州刺史喬鍾葵

史炤釋文曰嵐州名在太原因岢嵐山為名有渥洼地出良馬亦山氣也余按史炤之說全引廣韻廣韻

以為嵐州近太原猶可史炤以為在太原則繆矣漢武帝得神馬渥洼水中李斐以為在敦煌界今云嵐州有渥洼地未知廣韻何所據也至云亦山氣也則是廣韻解嵐字為山嵐之嵐其義不為嵐州發也炤亦引之以釋嵐州可謂無所決擇矣

楊素姪玄挺

史炤釋文作玄挺注云挺抽延切

費本同

余按隋書作

玄挺音徒鼎翻通鑑諸本亦皆作玄挺

通鑑一百八十一 凡二條

倭王多利思比孤

史炤釋文曰倭女王國名在東海中

費本同

余按范曄

後漢書倭國在韓國東南大海中依山島而居其地  
大較在會稽東冶之東與朱崖儋耳相近漢桓靈間  
倭國大亂更相攻伐歷年無主有一女子名卑彌呼  
事鬼神道能以妖惑衆於是共立為王當時因謂之  
女王國又按新唐書曰日本古倭奴也其王姓阿每

氏自言初主號天御中主至彥瀲三十二世自彥瀲  
至目多利思比孤三十一世其間惟一世立女王耳  
桓靈之際固嘗謂之女王國隋唐之間豈復謂之女  
王國哉

八年宣社於南桑乾水上

史炤釋文曰桑乾即馬邑屬雁門余按漢書地理志  
馬邑縣屬雁門郡桑乾縣屬代郡自是兩縣而謂桑  
乾即馬邑可乎水經濕水出雁門陰館縣東北過代

郡桑乾縣南與桑乾水會因總謂之桑乾水東北流  
過薊縣故城南時煬帝在薊將伐高麗故宣社於桑  
乾水上

通鑑一百八十二

凡三條

九年詔徵天下兵集涿郡

史炤釋文曰涿范陽邑余按通鑑本文曰涿郡而史  
炤以范陽之邑誤矣自漢高帝置涿郡而治涿縣曹  
魏改涿郡曰范陽郡隋開皇初廢范陽郡大業初併

燕范陽置涿郡治薊而涿縣屬焉此郡名廢置徙治  
離合之辨也

閿鄉張須陀

史炤釋文曰閿鄉在洪農胡縣余按史炤以漢地理  
為釋也元魏以胡縣為胡城縣隋開皇十八年改胡  
城縣為閿鄉縣史言閿鄉張須陀謂須陀乃此縣人  
也

衛文昇以步騎二萬度渼水

史炤釋文曰瀍水出河南北山入于河余按水經瀍水出河南穀城縣北山東與千金渠合東過洛陽縣南又東過偃師縣東入于洛炤釋所指河南抑河南郡和抑河南縣邪其言入河只泥禹貢伊洛瀍澗既入于河一語未嘗詳考川瀆之會歸也

通鑑一百八十三

凡四條

十二年蘇威曰他日賊據長白山今近在汜水

史炤釋文曰汜水名在河南成臯余按史炤亦是據



漢地理為釋也開皇十八年改成臯為汜水縣有汜水關時屬滎陽郡

林士弘與劉子翽戰于彭蠡湖

史炤釋文曰彭蠡澤名按尚書是江漢合處在揚州之西界余按江水與漢水合於夏口夏口今鄂州彭蠡湖在彭澤縣西禹貢言漢水過三澨至于大別南入于江東匯澤為彭蠡其言甚明何嘗言彭蠡是江漢合處漢書地理志湖漢水出雲都東至彭澤入江

言彭蠡是江水與湖漢合處則可矣

恭帝義寧元年突厥立劉武周為定楊可汗遺以狼頭

纛

史炤釋文曰突厥先為鄰國所破有一兒弃澤中與狼交合生十子其一最賢者為君長於牙門建狼頭纛故劉武周以此遺突厥余觀通鑑本文突厥立武周為可汗故遺以狼頭纛非武周以遺突厥也

朝邑法曹鄭孝謨以蒲津中渾二城降

史炤釋文曰河陽南有中潭城

費本同

余按字書水中

有沙曰潭隋都長安於蒲津起河橋以通河東故有中潭城以守固河橋河陽在洛陽北起橋以度河陰亦有中潭城以守固河橋中潭之名雖同而有河陽橋蒲津橋之異此時唐公引兵自河東欲濟河而西鄭孝謨以蒲津中潭二城降乃蒲津之中潭非河陽之中潭也蒲津城在橋之西岸

通鑑一百八十五

凡四條

唐高祖武德元年李密以楊汪為宋州總管

史炤釋文曰後周武帝以王謙為益州總管總管之

名始此

費本同

余按令狐德棻後周書周明帝武成元

年初改都督諸州軍事為總管其見於史者則安成  
公憲為益州總管尉遲綱為荊州總管尉遲迴為秦  
州總管則總管之名非始於用王謙也

隋煬帝謂蕭后曰儂不失為長城公卿不失為沈后

史炤釋文曰沈直金切言為沈湏之后

海陵本同

余謂煬

帝顧天下已亂知必為他人禽已與蕭后不失為陳  
後主夫婦也按陳後主為隋所禽封長城公其后沈  
氏君理之女也涉獵經史工書翰陳亡與後主俱入  
長安及後主薨后自為哀辭文甚酸切煬帝每所巡  
幸常令從駕及煬帝為宇文化及所弑后自廣陵還  
鄉里不知所終烏得謂沈后為沈湏之后乎沈音式  
荏翻

宇文化及於帳中南面坐人有白事者默然不對下牙

方取啓狀與唐奉義等參決之

史炤釋文曰牙旗名軍中所建下牙言其視事晚也  
余謂下牙猶古之言退朝也豈視事晚之謂乎劉馮  
事始曰牙旗者將軍之精軍行建牙後世至於官府  
早晚軍吏兩謁亦謂之牙呼謂既熟雖天子正殿受  
朝謁者亦名正牙

薛舉進逼高塘

史炤釋文曰高塘城名塘之石切

海陵本同

余按新唐書

地理志寧州定平縣有高塘城塘音章恕翻唐韵有  
塘字亦章恕切釋云番山豈西蕃中以山為塘乎下  
卷折塘音亦誤惟杜佑通典塘音思歷切

通鑑一百八十六

凡三條

程知節為王世充騎所逐刺槊洞過知節迴身捩折其  
槊

史炤釋文曰捩力計切捩也

海陵本同

余按韵書捩音

力計切琵琶撥也捩捩之捩音練結翻

右翊衛大將軍淮安王神通

史炤釋文曰唐有十六衛各有左右其左右衛及左

右金吾衛謂之四衛餘謂之雜衛

費本同

余按隋受周

禪置左右衛等十二府曰左右衛曰左右武衛曰左

右武侯曰左右領左右曰左右監門曰左右領軍唐

初置十六衛府曰左右翊衛曰左右驍騎衛曰左右

屯衛曰左右禦衛曰左右備身曰左右武衛曰左右

監門曰左右候衛至武德五年改左右翊衛曰左右



衛屯衛曰威衛禦衛曰領軍衛備身曰左右餘不改  
高宗龍朔二年始改左右候衛為左右金吾衛炤謂  
唐以左右衛及左右金吾衛為四衛蓋唐中世以後  
事也且炤不言翊衛置官之由而泛引四衛為釋未  
為精切

慕容順攻北海劉蘭成襲擊之公順大敗奔營走郡城  
獲全

史炤釋文提起走郡二字注曰走音奏趣嚮也余謂

當以弃營走為句以郡字屬下句走讀如字文理明白不煩注釋

通鑑一百八十七

凡四條

二年竇建德收隋鹵簿儀仗

史炤釋文曰炙轂子云車駕行幸羽儀導從謂之鹵簿字書鹵大盾也以甲為之所以捍敵甲楯部伍之次皆著之簿籍儀衛皆具五兵獨以甲楯為名者行道之時甲楯居外餘兵在內故謂鹵簿也

賁本同

又張

文伯曰五經精義云鹵大盾以大盾領一部之人故  
言鹵簿宋綬序鹵簿圖謂有文事則有武備故整法  
物之駕嚴兵師之衛摠曰鹵簿漢蔡邕獨斷曰漢天  
子出車駕次第謂之鹵簿官有注名曰甘泉鹵簿余  
謂此皆言天子法從儀物之鹵簿也然公卿儀從亦  
謂之鹵簿顏竣柄用於宋孝建之初其父延年常乘  
羸牛笨車逢竣鹵簿輒屏住道側語竣曰吾平生不  
憲見要人今不幸見汝沈慶之夢引鹵簿入廁中占

者曰後必富貴此公卿儀從亦謂之鹵簿之明證也  
唐制有皇后鹵簿外命婦三品已上亦有鹵簿車駕  
鹵簿固有甲楯皇后鹵簿必不用甲楯公卿及外命  
婦鹵簿烏得用甲楯乎然則以鹵簿為取鹵楯為義  
者末學膚受之說耳二百二十三卷代宗永泰元年  
鹵簿釋亦誤

王世充遣其將高毗寇義州

史炤釋文曰義州凡有五一在懷州武德縣一在衛

州汲縣一在易州容城縣一在光州商城縣一在眉  
州洪雅縣武德之義州乃世充境內非所寇者余按  
通鑑是年五月書世充陷義州復寇西濟州西濟州  
置於濟源縣新唐書地理志武德二年改懷州安昌  
縣為武德置北義州則武德之義州正唐境內非王  
世充境內也高毗所寇即北義州衛州汲縣之義州  
武德元年置亦唐境也

六月丁未劉武周進逼介州七月辛卯宋金剛寇浩州

史炤釋文於介州則注曰武德元年以介休縣置浩州又更名介州於浩州注則曰浩州本介休縣又有江州彭澤縣置浩州非此余按此一年事也自六月丁未至七月辛卯四十四日耳州名更改不應如是之遽是年通鑑又書劉武周屢遣兵攻西河浩州刺史劉瞻拒之及裴寂敗自晉州以北城鎮俱沒惟西河獨存又是年十一月通鑑又書劉武周寇浩州炤註曰是浩州有二武周所寇乃介休之浩州炤蓋守

介休置浩州之說殊不思通鑑於六月丁未已書武周陷介州若浩州本是介休縣則已歸武周矣新唐書地理志曰汾州治西河本浩州武德三年更名汾州隋義寧元年以介休平遙置介休郡武德元年曰介州則浩州置于西河介州置于介休明矣


杜伏威請降

史炤釋文曰杜伏威起淮南又據歷陽與陳稜李子通俱有窺江表之心後為李子通所敗來降海陵本

曰杜伏威起淮南後為李子通所破來降余按海陵  
本刪取史炤釋文以為注亦可以明其實蹈襲史炤  
而託之公休以欺世也詳觀通鑑本文李子通數破  
沈法興軍既克陳稜又破沈綸軍而伏威引去而伏  
威未嘗敗也至武德三年伏威遣輔公柝王雄誕等  
擊破子通四年又遣雄誕擊禽子通送長安曷嘗為  
子通所破哉蓋是時唐之威德暢洽故伏威請降五  
年秦王擊徐圓朗聲震淮泗伏威於是懼而入朝詳



考事之本末可以見矣



通鑑釋文辨誤卷八

欽定四庫全書

史部  
通鑑釋文辯誤卷十九

詳校官修撰臣錢 榮

刑部郎中臣許兆椿覆勘

總校官編修臣王燕緒

校對官修撰臣張書勲

謄錄監生臣張孝基

欽定四庫全書

通鑑釋文辯誤卷九

宋 胡三省 撰

通鑑一百八十八凡四條

三年趙郡公孝恭擊蕭銑東平王閼提斬之

史炤釋文曰閼辰遮切姓也余按古無閼姓閼提蓋  
蕭銑之子姪而封王

至世充自將戰兵左輔大將軍楊公卿帥左龍驤二十  
八府騎兵左遊擊大將軍郭善才帥內軍二十八府步

兵右遊擊大將軍跋野綱帥外軍二十八府步兵總三萬人以備唐

史炤釋文曰左右龍驤左右遊擊分騎兵步兵各有府皆隋之制王世充因之余按隋志無龍驤遊擊分騎步兵之制有府兵而已史炤以意妄為之說

七月世充洧州長史張公謹與刺史崔樞以州城來降史炤釋文曰洧州本尉氏縣王世充始置尉州武德四年以尉氏扶溝隰陵置洧州余按炤釋以新志尉

氏縣注為據而不考州縣之建置離合其歲月有先後也通鑑是年九月書世充尉州刺史時德敵帥所部杞夏陳隋許賴蔚七州來降炤又注曰尉州本尉氏縣王世充置武德三年時德敵以州來降秦王改為南汴州復改為洧州貞觀元年廢屬汴州若如炤說則王世充於尉氏縣置洧州二州也殊不知五代史明言隋置洧州於賴川之隰陵縣大業初廢蓋王世充復置洧州於隰陵縣置尉州於尉氏縣是年崔

樞時德敵既降唐明年唐乃以尉氏扶溝陽陵置洧  
州也

以高開道為蔚州總管

史炤釋文曰蔚州本鴈門郡又隋上谷郡飛狐縣也  
唐初沒突厥武德六年置余按蔚州本雁門郡之靈  
丘上谷郡之飛狐縣地東魏置靈丘郡後周置尉州  
隋廢郡及州以靈丘縣屬雁門郡唐為蔚州安邊郡  
後改興唐郡史炤於雁門郡下逸之靈丘三字失之

遠矣

通鑑一百八十九 凡六條

四年以靺鞨渠帥突地稽為燕州總管

史炤釋文曰燕州本靈壽縣隋置在唐廢焉屬鎮州

海陵本同余按舊唐書地理志義寧元年置燕州於靈壽

縣是年廢州復為靈壽縣屬恒州至穆宗諱恒始改

恒州為鎮州此燕州隋於營州之境汝羅故城置遼

西郡以處粟末靺鞨唐遂於其地置燕州以其渠帥



為總管非靈壽之燕州也

王世充平州刺史周仲隱以城來降

史炤釋文曰平州本當陽縣王世充置武德六年更名玉州八年州廢屬江陵郡余按當陽之平州本後周置隋廢之矣武德四年置平州於當陽因是年既平蕭銑而復置當陽乃蕭銑之地王世充安得而置平州竊意王世充置平州於洛州河陰縣河陰古平陰也蓋於此置平州

秦王世民被黃金甲齊王元吉等二十五將隨其後前  
後部鼓吹

史炤釋文曰凡鼓吹總八音言之余觀史炤釋鼓吹  
多以為音律壎篪之樂今又曰總八音言之是皆未  
知鼓吹之所從始也蔡邕曰鼓吹軍樂也黃帝岐伯  
所作以揚德建武勸士諷敵也後世謂之短簫競歌  
應劭漢鹵簿圖惟有騎執籥籥即笳不云鼓吹而漢  
世有黃門鼓吹漢享宴食舉樂十三曲與魏世鼓吹

長簫同長簫短簫伎錄並云絲竹合作執節者歌又  
建初錄云務成黃爵玄雲遠期皆騎吹曲非鼓吹曲  
此則列於殿庭者為鼓吹從行鼓吹為騎吹二曲異  
也又孫權觀魏武軍作鼓吹而還漢世萬人將軍給  
鼓吹魏晉世假將帥牙門曲蓋鼓吹唐宋以來天子  
郊祀竣事還宮鼓吹振作則是鼓吹之樂國容軍容  
皆用之

俘王世充竇建德獻于太廟行飲至之禮以饗之

海陵本釋文曰飲於禁切余按左傳三年而治兵出而振旅歸而飲至以數軍實杜預注曰飲於廟以數車徒器械及所獲也陸德明無音飲當讀如字

褒州道安撫使郭行方攻蕭銑荊州拔之

史炤釋文曰褒州本西縣武德三年置八年州廢屬興元余按褒州置於漢中蕭銑時據江陵唐置安撫使所以招撫銑衆必不置於漢中盖道里相去遠也時平王世充方得襄州必置安撫使於襄州既以安

撫新民又以招撫銑衆下書攻拔都州都州本樂鄉  
縣地貞觀八年廢都州以樂鄉屬襄州郭行方自襄  
州進攻都州道里便近褒當作襄又德宗朝方改梁  
州為興元府此時未應以西縣屬興元為言亦一誤  
也

徐圓朗昌州治中劉善行以須昌來降

史炤釋文曰昌州本蒲縣武德二年置貞觀元年州

廢隸隰州

費本同

余謂此時徐圓朗據兗鄆自以須昌

縣置昌州耳蒲縣之昌州遠在汾隰徐圓朗安能越關河而有此土邪

通鑑一百九十

凡九條

五年俚帥楊世界畧以循潮二州降

史炤釋文曰俚南夷之首

費本同

余按南夷曰蠻曰俚

曰蠻各是一種首字但可解帥字耳

二月戊寅汴州摠管王要漢攻徐圓朗杞州拔之

史炤釋文曰本北海縣始因營丘人拒賊權置杞州

時汴州雍丘縣亦置杞州非此

費本同

余按新唐書地

理志北海之杞州武德二年已復為營丘縣而雍丘之杞州與汴州接壤未經省併王要漢所攻拔者正北杞州乃以為非何邪

遷州人鄧士政執刺史李敬昂以反

史炤釋文曰按志闕此州

費本同

余按隋唐書地理志

西魏以房陵置遷州以秦漢以來諸侯王以罪廢者多遷房陵故以名州隋大業初改曰房州唐武德初

復曰遷州志未嘗闕此州也

高開道寇蠡州

史炤釋文曰蠡落戈切武德五年以蒲州博野縣置蠡州余按新唐書地理志武德五年以瀛州之博野清苑定州之義豐置蠡州盖因漢蠡吾亭以名州金人亦於博野縣置蠡州北至燕京四百九十里蠡音禮落戈切非蒲州當作瀛州

觀州刺史劉會以城叛附黑闥



史炤釋文曰觀州本九門縣隋置九門郡武德元年  
曰觀州五年廢屬鎮州時觀州有二其一在弓高縣  
非此費本同余按新唐書地理志武德四年置觀州於  
弓高而九門之觀州廢於五年劉會叛在是年十月  
蓋弓高之觀州為是

南州刺史龐孝恭

史炤釋文曰南州屬劔南道羈縻州武德二年開南  
蠻置二年更名楚州四年復故名費本同余按新唐書

地理志武德四年以合浦郡之合浦南昌二縣置南  
州通鑑下文書南越州甯道明高州首領馮暄俱反  
南越州今之廉州高州今猶如故則三州相挺而反  
皆在嶺南道此所謂南州乃合浦之南州非劔南道  
之羈縻州明矣

高開道引奚騎寇幽州

費氏本以奚為突注云突東胡別種突騎者突國騎  
兵也余徧考通鑑諸本皆作奚騎且東胡別種未嘗

有突國奚正東胡種也其先曰庫真奚亦曰庫莫奚  
八月甲辰突厥寇真州又寇馬邑

史炤釋文曰按志真州有三武德五年置真州曰南  
縣置積州及前真州貞觀元年改積州為後真州後  
皆廢唐劍南道復有真州今突厥所寇乃河東道然  
河東無此州志又不載疑字誤費本同余按史炤所謂

真州有三前真州置於九真移風縣後真州則是年  
置積州於日南縣九年改南陵州貞觀九年始改後

真州劔南之真州則天寶五載方分臨異郡置以新  
唐書地理志考之此時止有九真移風之真州亦非  
同時有三真州也史炤但見通鑑於此時書突厥寇  
真州又寇馬邑以為所寇乃河東道考之於志而河  
東道無真州遂疑字誤余詳考舊唐書地理志武德  
二年置綏州總管府營雲銀真等十一州此真州蓋  
置於銀州真鄉縣且通鑑上文書癸未突厥寇原州  
乙酉寇朔州原州屬關內道朔州屬河東道突厥入

寇之兵分為兩道八月甲辰寇真州者西路兵也寇馬邑者東路兵也史炤於河東道求真州所以失之愈遠

周法明登戰船飲酒張善安遣刺客數人詐乘漁牒而至遂殺法明而去

史炤釋文曰漁漁獵也余謂捕魚者為漁捕獸者為獵漁自是漁獵自是獵三尺童子能分別其義史炤之識不若童子鹵莽甚矣

通鑑一百九十一 凡二條

八年突厥寇蘭州

史炤釋文曰按突厥寇鄯岷等州併寇蘭州皆隴右道而隴右無蘭州蘭字疑作蘭余按史炤疑蘭州之當作蘭州是也但詳考通鑑突厥寇蘭州在九月至十月戊寅乃始寇鄯州無寇岷州事其所援據不無少差耳

突厥寇彭州

史炤釋文曰彭州屬羈縻州本洪州貞觀三年置屬隴右道按寧州彭原及劔南道復有兩彭州皆非此費本同余按隴右道之羈縻彭州本洪州貞觀三年置

七年方改彭州則此時隴右羈縻州未有彭州也劔南道之彭州武后垂拱二年方分益州置此二彭州皆非突厥所寇者也若寧州彭原縣之彭州乃武德元年置治合川縣唐都關中邠寧突厥兵衝也此時突厥正寇寧州彭原之彭州炤乃以為非可謂擇焉

不精矣

通鑑一百九十二 凡二條

九年韓州刺史封同人詐乘驛馬入朝

史炤釋文曰武德元年析潞州襄垣等縣置韓州貞

觀十七年州廢仍屬潞州又同州韓城縣置西韓州

非此同費本余謂襄垣之韓州去長安太遠封同人蓋

自韓城入朝

太宗貞觀元年吏部侍郎觀城劉林甫



史炤釋文曰觀城屬開德府

費本同

余按觀縣漢屬東

郡光武改曰衛縣晉魏屬頓丘郡曰衛國縣隋開皇六年改曰觀城縣屬魏州唐武德四年分屬澶州是年廢澶州縣還故屬代宗大歷七年復置澶州至宋始以澶州為開德府此時澶州已廢亦未有開德府也

通鑑一百九十三

凡二條

三年房玄齡不以已長格物

史炤釋文曰捍格於物無所容受也

費本同

余謂格正

也以己所能正人欲人人皆然謂之格非捍格之格也格字從木捍格之格從手六十卷漢獻帝初平二年邴原清議以格物與此同義史炤以為廢格之格亦非辯已在前

上謂侍臣曰李大亮可謂忠直賜以胡餅及荀悅漢紀史炤釋文曰胡餅汲水器余謂史炤但以廣韵為據易井卦羸其餅左傳孫蒯飲馬於重丘毀其餅是皆

謂汲器也戰國秦趙澠池之會藺相如曰請奏盆餅  
秦李斯上秦王書曰擊甕叩餅則餅者罌缶之類不  
特施之汲水且以為樂矣至唐人如楊惠元餅罌不  
發如韓愈詩無計離瓶罌則餅者以盛酒盛物不復  
以汲水器為餅矣唐太宗賜李大亮胡餅蓋酒器也  
非汲水器也今北人酌酒以相勸酌者亦曰胡餅未  
識其規制與太宗之胡餅合乎否也餅瓶字通

通鑑一百九十四 凡一條

十一年王珪令公主執筭行盥饋之禮

史炤釋文作筭注曰筭堅奚切簪也

費本同

余按此非

筭字乃筭字陸德明經典釋文曰筭音煩一音皮彥  
翻器名以葦若竹為之其形如筥衣之以青繒以盛  
棗栗暇脩之屬士昏禮曰舅坐于阼階西面姑坐于  
房外南面婦執筭棗栗進東面拜奠于舅席訖婦又  
執暇脩升進北面拜奠于姑席盥饋者士昏禮曰婦盥  
饋持豚合升側載鄭氏注曰側載者右胖載之舅俎

左胖載之姑俎異尊卑舅姑共席于奧其饌各以南  
為上王珪正令公主行婦禮史炤以為執筭義何所  
據

通鑑一百九十五 凡二條

十四年陳倉折衝都尉魯寧自恃高班慢罵陳倉尉  
史炤釋文曰班給也余謂班字固有給義然此班以  
班列為義晉行人子朱曰班爵同何以黜朱於朝梁  
武帝分百二十號將軍為二十四班皆班列之班也

唐制上府折衝都尉正四品上中府從四品下下府正五品下五品以上皆為高班

尚書左丞韋綜司農木槿價貴於民間

史炤釋文曰槿徒紅切木名花可為布出字書

海陵本費

本同余按槿諸容翻木一截也唐式柴長三尺五寸為一槿

通鑑一百九十六

凡八條

十五年突厥侯利苾可汗

史炤釋文作俟利必注曰俟渠之切余按諸本通鑑  
及新舊唐書皆作俟利必

百濟來告其王扶餘璋之喪

史炤釋文曰百濟西域國本扶餘別種余按百濟東  
夷國名其先以百家濟海種類寢盛遂以為國號炤  
既言百濟為扶餘之種亦必知扶餘之為東夷矣乃  
以百濟為西域國何自為乖越也

大度設自赤柯灤北走

史炤釋文曰灤音歷

海陵本同

余按灤音匹各翻今自江

淮以北率謂積水為灤音歷者艸名也一名貫衆見本草

西突厥乙毗陸可汗西擊康居道過米國破之

史炤釋文曰米國唐國枝底王者余謂唐當作康此字因傳寫而誤也新唐書曰康國古康居也枝底分王曰安曰曹曰石曰米曰何曰火尋曰戊地曰史

十七年魏徵薨命百官九品以上皆起喪給羽葆鼓吹



陪葬昭陵

史炤釋文曰羽葆天子華蓋天子之儀衛也又唐制  
鼓吹五部一鼓吹二羽葆羽葆部有十八曲鼓吹音  
律管壘之樂余按孔穎達正義曰羽葆者以鳥羽注  
於柄頭章懷太子賢曰葆以五采羽合聚為之鼓吹  
非音律管壘之樂辯已見前樂則有曲羽葆儀飾也  
安得有所謂十八曲此皆史炤無所根據而妄為之  
說又通鑑下文載徵妻裴氏之言曰徵平生儉素今

葬以一品羽儀非亡者之志則知給以羽葆非天子之儀衛也

壯士咎君譽梁猛彪

史炤釋文曰猛彪虎文余按梁猛彪者人姓名奚庸以虎文為釋

太子承乾嘗謂左右曰我試作可汗或因僵卧於地史炤釋文作僵仆注曰仆芳遇切余按諸本通鑑皆作僵卧作仆非

良久太子歎起

史炤釋文曰歎起有所吹起余謂歎忽也太子初馬僵臥於地良久忽然而起耳豈有所吹而起哉炤之踈僻如此

通鑑一百九十七

凡三條

十七年往返萬里道涉沙磧無水草

史炤釋文曰沙磧水渚有石者余按此沙蹟所謂沙漠大磧也既無水草又安得有水渚哉

薛延陀本一俟斤

史炤釋文曰北虜謂大臣曰俟斤余謂俟斤者突厥鐵勒諸部酋帥之稱

褚遂良上疏曰龍沙以北部落無算

史炤釋文曰廣志流沙在玉門關外有三名三龍沙

海陵本同

余謂龍沙即指言沙漠也自漢以來匈奴單于

所居謂之龍庭隨水州遷徙無常處故因謂沙幕為龍沙此即陰山之外大漠西盡居延東極遼海者也

玉門關外之流沙介在西垂非褚遂良所指之龍沙  
邪律德光之死而北歸也趙延壽謂人曰我不復入  
龍沙矣亦謂沙漠

通鑑一百九十八凡四條

十九年上自繫薪於馬鞘以助役

史炤釋文曰鞘仙妙切馬上刀劒室也海陵本費本同余謂

鞘音所交翻鞭鞘也刀劒室安可以繫薪乎

上從飛騎三千人馳入臨渝關

史炤釋文曰渝容朱切臨渝關本曰臨閭關在平州  
石城縣余按漢書地理志北平郡有石城縣遼西郡  
有臨渝縣注云渝水首受白狼東入塞水經注云白  
狼水逕黃龍城西又東北出東流為二水右水疑即  
渝水也西南廵山逕一故城西以為河連城疑是臨  
渝縣之故城新唐書地理志營州城西四百八十里  
有渝關守捉五代史云幽州北七百里渝關下有  
渝水通海循海有道狹處纔數尺是所謂臨渝關也

宋白續通典曰漢石城舊縣取碣石立如城以名之  
唐貞觀十五年於故臨渝縣城置臨渝縣萬歲通天  
二年改為石城臨渝在石城猶有足徵所謂臨渝者  
以臨渝水而名若曰臨閭殊無所據漢書音義渝音  
喻今讀如字

二十年上嘗幸未央宮辟仗已過

史炤釋文曰辟匹亦切執兵仗以辟行人

海陵本同

余謂

炤釋義是而音非辟讀為闢若匹亦切則讀如僻矣

二十一年高士廉遺言不欲以北首夷衾輒屈車駕  
史炤釋文曰禮記自小斂以往用夷衾夷衾質殺之  
裁猶冒也注云冒所以韜尸重形者也小斂又覆以  
夷衾製如冒耳大夫玄冒黼殺綴旁五凡冒質長與手  
黼殺綴旁七大夫玄冒黼殺綴旁五凡冒質長與手  
齊殺三尺自小斂以往用夷衾夷衾質殺之裁猶冒  
也鄭玄注云冒者既襲所以韜尸重形也殺冒之下  
韜韜足上行者也小斂又覆以夷衾裁猶制也孔頴



達正義曰冒謂襲後小斂前所用以韜尸也冒有質殺者作兩囊每輒橫縫合一頭又縫連一邊餘一邊不縫兩囊皆然也上者曰質下者曰殺故鄭注士喪禮云冒韜尸者制如直囊上曰質下曰殺質正也其用之先以殺韜足而上後以質韜首而下綴旁七者上下安七帶綴以結之故云綴旁七也大夫綴旁五及玄冒者尊卑之差也凡冒質長與手齊言冒之質從頭韜來至下長短與手齊也殺三尺者殺從足韜

上長三尺自小斂以往用夷衾者往猶後也小斂前有冒故不用夷衾自小斂後衣多不可用冒故用夷衾覆之也士喪禮云幬用夷衾覆尸柩之衾也夷衾質殺之裁猶冒也者裁猶制也言夷衾所用上齊於手下二尺所用繒色及長短制度如冒之質殺但不復為囊及旁綴也然始死幬用斂衾是大斂之衾自小斂以前覆之至小斂時君錦衾大夫縞衾用之小斂斂訖別制夷衾以覆之其小斂以前所用大斂之

衾停而不用至將大斂及陳衣又更制一衾主用大斂也所謂大斂二衾者其夷衾至大斂時所用無文當應總入大斂衣內併斂之也合注䟽而觀之則夷衾上質下殺之制如冒而不為囊及旁綴固與冒有不同者

通鑑一百九十九

凡一條

高宗永徽元年有司以為服既公除欲以今秋成昏  
史炤釋文曰公除從吉也王氏音訓謂已成服除之

以從公家之事不待終制也余謂公除即漢文帝三十七日釋服之遺制曰公除者以天下為公外雖除服以臨政而親親之思結於內猶終三年之慕公則除服私則未之除也

通鑑二百

凡二條

六年徙居蓬萊宮

史炤釋文曰蓬萊宮在京城東北余按唐都長安外城謂之京城次城謂之皇城內城謂之宮城蓬萊宮

在宮城內直東北角不在京城東北蓬萊宮後更名  
含元宮又曰大明宮大明宮曰東內太極宮曰西內  
皆在宮城中

龍朔元年新羅王春秋遣其將金欽將兵至古泗

史炤釋文曰說文泗受濟水東入淮余謂古泗地名  
在百濟國中非中國之泗水不可妄引以為釋然其  
言中國之泗受濟水亦只說湖陸以南之泗水以其  
於古泗不相涉故不復辯

通鑑二百一 凡二條

麟德元年州縣每發百姓為兵其壯而富者行錢參逐  
皆亡匿得免

史炤釋文曰參倉含切參互余謂參逐者參逐之人  
也州縣發人為兵守令不能家至而人發之必有參  
逐之人以為用參者參預其事者也今之吏典逐者  
隨逐其後者也今之親隨壯富之人行錢於參逐之  
人以求免為兵參逐之人既受其賂掩覆而縱之使

得亡匿也唐人常語有言參隨者猶參逐也

勲官挽引勞苦與白丁無殊

史炤釋文曰民男女年十八以上為丁丁從徭役余按唐制民丁從征役得勲級者為勲官無勲級者為白丁且男年十八以上為丁女曷嘗為丁哉

通鑑二百二凡二條

咸亨三年王及善曰擲倒自有伶官

費本注曰伶爐斤切說文弄也余按字書伶郎丁翻

無從爐斤切者炤釋用說文而音切則妄自為之  
四年八品九品並鍤石帶

史炤釋文曰鍤容朱切余按鍤石似金今人多以藥  
物鍊銅為鍤者音託侯翻宋時八品九品官猶鍤石  
帶史炤仕宋至京官不知有鍤石帶而妄為之音何  
耶

通鑑二百三 凡三條

永淳元年魏元忠閱視赤縣獄



史炤釋文曰中國名曰赤縣神州

費本同

余按史炤引

騶衍之說衍之說先列中國名山大川通谷禽獸水土所殖物類所珍因而推之及海外人之所不能睹以為儒者所謂中國者於天下乃八十一分居其一分耳中國名曰赤縣神州神州自有九州禹之序九州是也不得為州數中國外如神州赤縣者九乃所謂九州也於是有裨海環之人民禽獸莫能相通者如一區中乃為一州如此者九乃有大瀛海環其外

天地之際焉史炤引此以釋赤縣則唐之十道乃禹迹之九州是魏元忠悉閱唐十道獄也其說闊遠而不切於事情蓋唐之西京以長安萬年為赤縣東都以河南洛陽為赤縣魏元忠所閱者長安萬年兩赤縣獄耳

弘道元年突厥寇蔚州豐州都督崔智辯邀之於朝那山北兵敗為虜所擒

史炤釋文曰朝直遙切那奴多切余按丁度集韻朝

那之朝音與邾同音追輸翻二百九卷中宗景龍二年朝那山音亦誤

則天垂拱元年樂城文獻公劉仁軌薨

史炤釋文曰劉仁軌汴州尉氏人仁軌子及兄子授上柱國者三人州黨榮之號所居為樂城鄉三柱里余謂此因其封邑而名鄉耳樂城縣屬温州武德五年分永嘉置非劉仁軌所封者也漢書地理志河間國有樂城縣後魏改為樂壽縣唐屬瀛州樂城古城

在樂壽縣東南十六里唐以古縣名封仁軌

通鑑二百四

凡一條

三年黑齒常之大破突厥於黃花堆

史炤釋文曰黃花堆突厥地名余按黃花在神武川  
元和初朱邪執宜所保之地其地在朔州塞內非突  
厥地也魏收地形志後魏置神武郡於神武川

通鑑二百五

凡一條

延載元年突厥可汗骨篤祿卒弟默啜自立為可汗

史炤釋文曰默啜突厥種名余按通鑑明言默啜為骨篤祿之弟則默啜乃人名非種名也

通鑑二百六

凡三條

神功元年孫萬榮與其奴逃至潞水東

史炤釋文曰潞水在潞州為并州浸即濁漳水也余按周禮職方氏并州其浸洩易冀州其浸汾潞其川漳則漳自是漳潞自是潞以周官職方言之則潞非并州浸以漢地理志言之則潞州漢上黨郡也春秋

潞子之國有潞川上黨郡漢屬并州然皆非孫萬榮授首之地按萬榮時攻幽州軍潰至潞水東為奴所殺是唐幽州之潞水非漢上黨之潞川也水經鮑丘水從塞外來南逕漁陽縣東又南過潞縣西謂之潞水漢光武遣鄧隆擊彭寵軍於潞南即是水也孫萬榮正死於是水之東

聖歷元年狄仁傑因食疏糲

史炤釋文曰疏菜食也糲脫粟也張晏曰一斛粟舂

七斗米為糲余按詩召旻云彼疏斯稗箋云疏羸也  
謂糲米米之率糲十稗九鑿八侍御七字林云糲米  
一斛舂為八斗此皆疏即糲也九章算術粟一石為  
糲米六斗舂糲一斗為稗九升又舂為侍御則七升  
又曰凡穀一舂一簸為糲米唯論語飯疏食飲水孔  
氏注以疏食為菜食諸儒生皆不主其說以疏食為  
羸飯然疏食猶可以菜食為說若疏糲不若用諸家  
之說為文從義順也

二年左衛鎧曹參軍郭元振

史炤釋文曰參軍官名十六衛皆同鎧曹後改為胄  
曹余按史炤但以參軍為官名參軍之官名何從始  
耶沈約曰參軍後漢官孫堅為車騎參軍事是也本  
於府主無敬晉世孫楚為大司馬石苞參軍輕慢苞  
始制施敬晉永嘉之亂中州人士避亂南度晉元帝  
以琅邪王鎮建業悉羅致為參軍掾屬行參軍所謂  
百六掾是也既而為晉王以參軍為奉車都尉掾屬



為駙馬都尉行參軍舍人為騎都尉而諸公府都督  
府置諮議參軍因漢末軍諮祭酒而為之名也至宋  
有錄事記室戶曹倉曹中直兵外兵騎兵長流賊曹  
刑獄賊曹城局賊曹法曹田曹水曹鎧曹車曹士曹  
集右戶墨曹凡十八曹參軍參軍不署曹者無定員  
至唐惟衛府率府有錄事及諸曹參軍諸州有錄事  
及諸司參軍

通鑑二百七

凡三條

長安四年太后疾少間

史炤釋文曰間居覓切少愈也余按論語病間釋音如字孔云少差也史炤釋文凡疾間之間並從去聲未知何據

久視四年賈敬宗奏張昌宗強市人田

史炤釋文曰強其兩切抑買之也余謂強其良翻非人所願以威勢逼抑而市之謂之強市

成均祭酒同鸞臺鳳閣三品李嶠罷為地官尚書

史炤釋文曰五帝名學曰成均余按唐百官志垂拱  
元年改國子監曰成均監以國子祭酒為成均祭酒

通鑑釋文辯誤卷九